

Na osnovu člana IV 4.a) Ustava Bosne i Hercegovine, Parlamentarna skupština Bosne i Hercegovine, na ____ . sjednici Predstavničkog doma, održanoj ____ . ____ .2016. godine i na ____ . sjednici Doma naroda, održanoj ____ . ____ .2016. godine, usvojila je

ZAKON O IZMJENAMA I DOPUNAMA IZBORNOG ZAKONA BOSNE I HERCEGOVINE

Član 1.

U Izbornom zakonu Bosne i Hercegovine („Službeni glasnik BiH”, br. 23/01, 07/02, 09/02, 20/02, 25/02, 04/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13 i 7/14) u Poglavlju 19. Grad Mostar član 19.2 mijenja se i glasi:

“Član 19.2

(1) Gradsko vijeće se sastoji od 35 vijećnika. Vijećnici se biraju u izbornim jedinicama, na način utvrđen u članu 19.4 ovog Zakona.

(2) Izborne jedinice u smislu stava (1) ovog člana su Centralna zona i šest gradskih područja koja odgovaraju bivšim gradskim općinama, a čije granice su utvrđene mapom priloženom u Privremenom statutu objavljenom u “Gradskom službenom glasniku Grada Mostara”, broj 1/96 od 20. februara 1996. godine. Izborna jedinica 1 sastoji se od gradskog područja Mostar-Sjever. Izborna jedinica 2 sastoji se od gradskog područja Mostar-Stari grad. Izborna jedinica 3 sastoji se od gradskog područja Mostar-Jugoistok. Izborna jedinica 4 sastoji se od gradskog područja Mostar-Jug. Izborna jedinica 5 sastoji se od gradskog područja Mostar-Jugozapad. Izborna jedinica 6 sastoji se od gradskog područja Mostar-Zapad. Izborna jedinica 7 sastoji se od Centralne zone.”

Član 2.

Član 19.4 mijenja se i glasi:

“Član 19.4

(1) Vijećnici se biraju iz izbornih jedinica na slijedeći način:

- a) Četiri (4) vijećnika se biraju iz Izborne jedinice 1.
- b) Osam (8) vijećnika se biraju iz Izborne jedinice 2.
- c) Po tri (3) vijećnika se biraju iz Izbornih jedinica 3 i 4.
- d) Deset (10) vijećnika se biraju iz Izborne jedinice 5.
- e) Šest (6) vijećnika se biraju iz Izborne jedinice 6.
- f) Jedan (1) vijećnik se bira iz Izborne jedinice 7.

(2) Najmanje četiri (4) predstavnika iz reda svakog konstitutivnog naroda i jedan (1) iz reda Ostalih će biti zastupljeni u Gradskom vijeću.

(3) Nijedan od konstitutivnih naroda ne može imati više od petnaest (15) vijećnika.”

Član 3.

Član 19.5 mijenja se i glasi:

“Član 19.5

(1) Da bi se osigurala minimalna zastupljenost predstavnika iz reda svakog konstitutivnog naroda i reda Ostalih u skladu sa članom 19.4 stav (2) ovog Zakona, prvo se dodjeljuju mandati po četvorici (4) kandidata iz reda svakog konstitutivnog naroda i jednom kandidatu (1) iz reda Ostalih koji su dobili najveći količnik prema formuli utvrđenoj u članu 9.5 ovog zakona sa liste političke stranke, sa liste nezavisnih kandidata ili sa liste koalicije, bez obzira iz koje izborne jedinice su kandidovani. Preostala 22 mandata dodjeljuju se po postupku utvrđenom u članu 19.6 ovog Zakona.”

Član 4.

Član 19.6 mijenja se i glasi:

“Član 19.6

(1) Mandati koji se popunjavaju iz izbornih jedinica nakon toga se dodjeljuju prema formuli utvrđenoj u članu 9.5 ovog Zakona. Mandati se dodjeljuju pojedinačno počevši sa najviše rangiranim kandidatom u svakoj izbornoj jedinici, redoslijedom ka niže rangiranim kandidatima u svakoj izbornoj jedinici i nastavlja se na sličan način kako bi se popunilo svako dostupno mjesto iz svake izborne jedinice.

(2) Ukoliko bi dodjela mandata iz izborne jedinice vodila ka zastupljenosti jednog konstitutivnog naroda preko kvote koja je utvrđena prema članu 19.4 stav (3) ovog Zakona, prekobrojni mandati sa najmanjim količnikom iz bilo koje izborne jedinice preraspodijelit će se sljedećim metodom:

- a) Mandat će biti preraspodijeljen kandidatu koji ne pripada datom konstitutivnom narodu koji je dobio najveći broj glasova na listi političke stranke, liste nezavisnih kandidata ili koalicije kojima je mandat dodijeljen u skladu sa članom 9.5 stav (1) ovog Zakona. Ako bi se mandat prema formuli iz člana 9.5 stav (1) ovog Zakona dodjeljivao nezavisnom kandidatu, primjenjivat će se tačka b) ovog člana.
- b) Ako takav kandidat ne postoji ili ako bi se mandat prema formuli iz člana 9.5 stav (1) ovog Zakona dodjeljivao nezavisnom kandidatu, mandat se prenosi u istu izbornu jedinicu:
 - 1) političkoj stranci, listi nezavisnih kandidata ili koalicije koja ima kandidata koji ne pripada datom konstitutivnom narodu koji je preostao na listi; ili
 - 2) nezavisnom kandidatu ili kandidatima koji ne pripadaju datom konstitutivnom narodu koji imaju najveći sljedeći količnik kao što je to utvrđeno u članu 9.5 ovog Zakona.”

Član 5.

Član 19.7 mijenja se i glasi:

“Član 19.7

(1) Izuzetno od odredaba člana 13.7 ovog Zakona, gradonačelnik i dva dogradonačelnika Grada Mostara biraju se indirektno u skladu sa Ustavom Federacije Bosne i Hercegovine.

(2) Gradonačelnik i dva dogradonačelnika Grada Mostara biraju se dvotrećinskom većinom izabranih gradskih vijećnika sa liste kandidata koje neposredno biraju birači upisani u Centralni birački spisak da glasaju u Gradu Mostaru. Lista kandidata sastoji se od najviše po dva kandidata iz reda svakog konstitutivnog naroda i najviše jednog kandidata iz reda Ostalih koji dobiju najveći broj glasova birača među nominovanim kandidatima iz reda istog konstitutivnog naroda odnosno iz reda Ostalih na jedinstvenoj listi nominovanih kandidata. Svaki birač upisan u Centralni birački spisak da glasa u Gradu Mostaru može glasati samo za jednog nominovanog kandidata na jedinstvenoj listi nominovanih kandidata. Svaki politički subjekt registrovan za izbore može nominovati samo jednog kandidata na jedinstvenu listu nominovanih kandidata. Prije izbora, nominovani kandidati moraju izjaviti u pisanoj formi da prihvataju kandidaturu.

(3) Gradonačelnik i dogradonačelnici će biti iz reda različitih konstitutivnih naroda ili Ostalih. Nakon svakog mandata gradonačelnik će biti iz reda različitog konstitutivnog naroda ili Ostalih u odnosu na prethodni mandat.

(4) Izbor gradonačelnika i dva dogradonačelnika vrši se istovremeno, na prvoj sjednici Gradskog vijeća nakon lokalnih izbora. Svaki vijećnik može glasati samo za jednog kandidata.

(5) Kandidat sa liste kandidata iz stava (2) ovog člana koji u prvom krugu glasanja dobije dvotrećinsku većinu glasova gradskih vijećnika, a ne pripada istom konstitutivnom narodu iz kojeg je biran prethodni gradonačelnik, izabran je za gradonačelnika. Kandidati sa sljedećim najvećim brojem dobijenih glasova izabrani su za dogradonačelnike.

(6) Ukoliko nijedan od kandidata koji ne pripadaju istom konstitutivnom narodu iz kojeg je biran prethodni gradonačelnik ne dobije dvotrećinsku većinu glasova u prvom krugu, vrši se drugi krug izbora između kandidata koji su u prvom krugu dobili najveći broj glasova vijećnika iz reda svog konstitutivnog naroda. U drugom krugu, za gradonačelnika je izabran kandidat koji dobije veći ukupan broj glasova a ne pripada istom konstitutivnom narodu iz kojeg je biran prethodni gradonačelnik, a preostala dva kandidata su izabrani za dogradonačelnike, pod uslovom da je svaki od tri kandidata dobio najmanje polovinu glasova vijećnika iz reda svog konstitutivnog naroda. Ukoliko jedan od kandidata u drugom krugu ne dobije najmanje polovinu glasova vijećnika iz reda svog konstitutivnog naroda, za gradonačelnika je izabran kandidat koji je u drugom krugu dobio veći broj glasova vijećnika iz reda svog konstitutivnog naroda a ne pripada istom konstitutivnom narodu iz kojeg je biran prethodni gradonačelnik, a preostala dva kandidata su izabrana za dogradonačelnike.

(7) Odmah nakon izbora, izabrani kandidati daju izjavu o tome da li prihvataju izbor. Ukoliko izabrani kandidati odbiju izbor, izbori će se ponoviti prema postupku propisanom u prethodnim stavovima.

Član 6.

Ovaj zakon stupa na snagu narednog dana od dana objavljivanja u Službenom glasniku BiH.